

08/03/1997

Mandela sanjung jasa Yahaya

Shamshul Azree Samshir

SHAH ALAM, Jumaat - Kehilangan tokoh korporat Melayu, Allahyarham Tan Sri Yahaya Ahmad, bukan sekadar dirasai oleh rakyat Malaysia, malah turut memberi kesan kepada penduduk Afrika Selatan.

Presiden Afrika Selatan, Nelson Mandela, berkata rakyat negaranya turut merasai kehilangan Yahaya yang dianggap mempunyai minat yang tinggi untuk meningkatkan kerjasama Malaysia dan Afrika Selatan.

Menurutnya, pemergian Yahaya yang dianggap rakan berbakat serta komited bagaimanapun tidak akan mengubah perkembangan bidang perdagangan antara dua negara.

"Pemergian Yahaya yang tragis dan terlalu awal itu bukan sekadar memberi kesan kepada rakyat Malaysia, malah dirasai oleh penduduk Afrika Selatan.

"Bagaimanapun, kami yakin kemajuan dalam kerjasama perdagangan antara dua negara tidak berubah walaupun berlaku perubahan.

"Kita juga tidak menafikan kematian tokoh itu akan meninggalkan kesan kepada semua," katanya ketika berucap dalam lawatannya di Kilang Proton di sini, hari ini.

Turut hadir pada majlis itu, Menteri Tenaga Telekom dan Pos, Datuk Leo Moggie; Penasihat Ekonomi Negara, Tun Daim Zainuddin; Pengerusi Hicom Holdings Berhad, Datuk Mohd Saleh Sulong dan anggota delegasi dari Afrika Selatan.

Mandela berkata, Afrika Selatan menyanjung tinggi pengorbanan, pembabitan dan sumbangan aktif Yahaya dalam meningkatkan kerjasama terutama ekonomi antara kedua-dua negara.

"Yahaya mengetuai delegasi 250 ahli perniagaan Malaysia ke Afrika Selatan sempena lawatan Perdana Menteri, Datuk Seri Dr Mahathir Mohamad pada Ogos 1995.

"Berikutan itu, Malaysia kini menjadi negara keempat terbesar dalam kumpulan pelabur asing yang menanam modal di Afrika Selatan," katanya.

Beliau berkata, Yahaya menunjukkan minat yang mendalam untuk membina kilang memasang kereta dan turut berminat untuk membuka kilang memasang motosikal di Afrika Selatan.

"Wawasan Yahaya adalah selaras dengan idea kami untuk mengukuhkan lagi perniagaan kulit hitam.

"Perjanjian yang ditandatangani Hicom dengan dua kumpulan pelaburan kulit hitam membayangkan Yahaya memahami kemahuan kami," katanya.

Beliau berkata, komitmen yang ditunjukkan Yahaya juga membolehkan forum perdagangan terbesar mampu dikendalikan di Afrika Selatan.

Mandela berkata, beliau sedih kerana sepatutnya dapat bertemu Yahaya pada majlis yang diadakan hari ini.

"Saya sepatutnya bertemu Yahaya hari ini bagi meneruskan lagi hubungan yang selama ini giat disemai oleh Yahaya," katanya.

Beliau berkata, seluruh rakyat Afrika Selatan, kerajaan dan sektor perdagangan negara itu mengucapkan takziah atas kematian Yahaya terutama kepada keluarga Allahyarham.

(END)